

PROFIL

Nama : Syed Mohamad Hamzah Al-Junid bin Syed Abdul Rahman
Tarikh Lahir : 15 Mac 1983
Tempat Lahir : Bukit Selambau, Kedah Darul Aman
Pendidikan : Ijazah Sarjana Muda Kejuruteraan Elektrik (Elektronik) Kelas Pertama, Universiti Malaysia Pahang
Jawatan : 1. Pengurus dan pemilik AJ Infinite Enterprise
2. Ahli Lembaga Pengarah UMP

Kejayaan dan Pencapaian:

1. Anugerah Pelajaran di-Raja – Pingat Jaya Cemerlang 2007
2. Pingat Tunku Abdul Rahman 2008 (Best IPTA/IPTS Student Session 2006/2007)
3. Anugerah Dekan, Semester I Sesi 2002/2003, Semester II Sesi 2002/2003, Semester I Sesi 2003/2004, Semester II 2003/2004, Semester I 2004/2005, Semester II 2004/2005, Semester I 2005/2006 dan Semester II 2005/2006.
4. *Student's Award 2004/2005* (Best Student Leadership Award)
5. Pingat emas untuk Invention CCM VERSION 2.1 – 20th International Invention, Innovation & Technology Exhibition ITEX 2009, Kuala Lumpur, Malaysia
6. Pingat emas untuk Invention Zero Cross Correlation Code Encoder/ Decoder for Optical Code Division Multiple Access (OCDMA) – 20th International Invention, Innovation & Technology Exhibition ITEX 2009, Kuala Lumpur, Malaysia
7. Pingat gangsa di PENCIPTA untuk projek bertajuk Zero Cross Correlation Code Encoder/ Decoder for Optical Code Division Multiple Access (OCDMA) – International Exposition of Research and Invention of Institutions of Higher Learning 2009
8. Konsultan kepada World Health Organization (WHO)
9. Konsultan kepada European Commission (EC)
10. Konsultan kepada GTZ Deutsche Gesellschaft for Technische Zusammenarbeit)

Alumni perlu berganding bahu demi kecemerlangan UMP

Siapa sangka walaupun baharu berumur 28 tahun, bekas pelajar Universiti Malaysia Pahang (UMP) ini mampu menempatkan dirinya di antara barisan ahli perniagaan yang berjaya apabila mula melibatkan diri dalam dunia perniagaan membekal peralatan makmal dan kejuruteraan dengan hanya bermodalkan RM3,000 di awal perniagaannya.

Pilihan Sidang Editorial *Create* untuk menghiasi ruangan Personaliti Pilihan kali ini amat istimewa sekali kerana beliau mempunyai dwi peranan yang amat penting di UMP dalam satu masa. Yang Berbahagia Tuan Syed Mohamad Hamzah Al-Junid bukan sahaja terpaksa menggalas

tanggungjawab sebagai Alumni UMP yang berperanan melakukan tugas sukarelawan untuk UMP, malahan beliau juga merupakan antara Ahli Lembaga Pengarah Universiti yang termuda pernah dilantik oleh UMP.

Walaupun beliau menyifatkan dirinya masih mentah berkenaan dengan selok-belok dunia perniagaan apatah lagi berkenaan pengurusan universiti, namun tanggungjawab yang diamanahkan kepada beliau untuk membangunkan UMP disambut dengan penuh semangat demi melihat universiti ini setanding dengan universiti terkemuka yang lain.

Kami di Sidang Editorial *Create*

amat berbesar hati apabila Ahli Lembaga Pengarah paling muda dalam sejarah penubuhan UMP ini, tidak keberatan untuk ditemubual dan berkongsi pengalaman serta pendapat diri dalam tatapan pembaca setia *Create*.

Segalanya Bermula di UMP

Kejayaan dalam dunia perniagaan yang dikecapi pada hari ini bermula apabila beliau berada di tahun akhir pengajian, yang mana pada ketika itu, beliau telah pun menunjukkan minat yang mendalam untuk melibatkan diri dalam dunia perniagaan tetapi terpaksa menangguhkan dulu hasrat tersebut bagi mendapatkan segala ilmu berkenaan dunia kejuruteraan dan segulung ijazah yang kelak dapat membantu beliau untuk menguruskan sebuah perniagaan yang dicita-citakan selama ini.

Namun, impian semakin menjadi kenyataan apabila beliau menjalani latihan industri di akhir semester pada tahun 2006 dan pada tahun itu juga beliau telah mendaftarkan perniagaannya di Suruhanjaya Syarikat Malaysia bagi memulakan perniagaannya.

Jelas beliau, pada awal perniagaan, beliau hanya menjalankan perniagaannya

seorang diri tanpa memiliki pejabat dan pekerja, namun hasil usaha keras, akhirnya pada tahun 2008, perniagaannya semakin membuahkan hasil.

“Kini saya telah pun mempunyai seramai lima orang jurutera yang bekerja di syarikat saya,” jelas Tuan Syed Mohamad Hamzah apabila diaju pengalaman beliau memulakan perniagaan tersebut.

Bak kata pepatah, kejayaan itu tidak akan datang bergolek, tanpa diiringi dengan usaha dan kerja keras. Melihat kepada kejayaan yang dikecapi pada hari ini, tidak keterlaluan jika kami di Sidang Editorial *Create* menyatakan bahawa beliau telah membuktikan bahawa hasil usaha keras dan tekad yang tinggi seseorang itu mampu merealisasikan apa jua impian yang diimpikan.

Kini, Tuan Syed Mohammad Hamzah mampu tersenyum puas apabila Syarikat AJ Infinite Enterprise yang dimilikinya bukan hanya beroperasi di Malaysia malahan telah melangkau ke peringkat global. Walaupun beliau sibuk dengan kerja hakikinya mengendalikan perusahaan tersebut, namun tanggungjawab yang diberikan selaku Ahli Lembaga Pengarah UMP juga tidak dilupakan.